


特別  
ル 5  
3537  
30





特

門九五  
號3537  
卷30

重修揚州府志卷之四十九

人物志四

忠義

漢

劉瑜字季節廣陵人高祖父廣陵靖王父辯清河太守  
瑜少好經學尤善圖讖天文麻算之術州郡禮請不就  
延熹八年太尉楊秉舉賢良方正及到京師上書陳事  
曰諸侯之位上法四七垂文炳耀關之盛衰者也今中  
官邪孽比肩裂土皆競立允嗣繼體傳爵或乞子疎屬  
或買兒市道殆乖開國承家之義古者天子一娶九女  
娣姪有序河圖授嗣正在九房今女嬖令色充積閨幃



皆當盛其玩飾冗食空官勞散精神生長六疾此國之  
費也生之傷也且天地之性陰陽正紀隔絕其道則水  
旱爲并詩云五日爲期六日不詹怨曠作歌仲尼所錄  
況從幼至長幽藏歿身又常侍黃門亦廣妻娶怨毒之  
氣結成妖眚行路之言官發略人女取而復置轉相驚  
懼孰不悉然無緣空生此謗鄒衍匹夫杞氏匹婦尙有  
城崩霜隕之異況乃羣輩咨怨能無感乎昔秦作阿房  
國多刑人今第舍增多窮極奇巧掘山攻石不避時令  
促以嚴刑威以正法民無罪而覆入之民有田而覆奪  
之州郡官府各自考事姦情賂賂皆爲吏餌民愁鬱結  
起入賊黨官輒興兵誅討其罪貧困之民或有賣其首  
級以要酬賞父兄相代殘身妻孥相視分裂窮之如彼  
伐之如此豈不痛哉又陛下以北辰之尊神器之寶而  
微行近習之家私幸宦官之舍賓客市買熏灼道路因  
此暴縱無所不容今三公在位皆博達道藝而各正諸  
已莫或匡益者非不智也畏死罰也惟陛下設置七臣  
以廣諫道及開東序金滕史官之書從堯舜禹湯文武  
致興之道遠佞邪之人放鄭衛之聲則政致和平德感  
祥風矣於是特詔召瑜問災咎之徵指事案經讖以對  
執政者欲令瑜依違其辭而更策以他事瑜復悉心以

對八千餘言有切于前帝竟不能用拜為議郎及帝崩

大將軍竇武欲大誅宦官乃引瑜為侍中又以侍中尹

勳為尚書令共同謀畫及武敗瑜勳並被誅事在武傳

瑜誅後宦官悉焚其上書以為訛言子琬傳瑜學明占

候能著災異舉方正不行後漢書五十七 太平御覽

策高第人呼為長鬚方正寶武傳云武既輔朝政嘗

有誅翦宦官之意太傅陳蕃亦素有謀武於是引同志

尹勳為尚書令劉瑜為侍中馮述為屯騎校尉列于朝

廷請前越嵩太守荀昱為從事中郎辟潁川陳寔為屬

共定計策至八月太白出西方劉瑜素善天文官惡之上

書皇太后曰太白犯房左驂上將星入太微其占宮門

當閉將相不利姦人在主旁願急防之又與武蕃書以

星辰錯繆不利大臣宜速斷大計武蕃得書將發于是

以朱寓為司隸校尉劉祐為河南尹虞祁為洛陽令武

乃奏免黃門令魏彪以所親小黃門山冰代之使冰奏

素狡猾尤無狀者長樂尚書鄭鳳送北寺獄蕃謂武曰

此曹子便當收殺何復考為武不從令冰與尹勳侍御

史祝瑁雜考風辭連及曹節王甫勳冰即奏收節等使

劉瑜內奏時武出宿歸府典中書者先以告長樂五官

史朱瑀瑀盜發武奏罵曰中官放縱者自可誅耳吾曹

何罪而當盡見族滅因大呼曰陳蕃竇武奏白太后廢

帝為大逆乃夜召素所親壯健者曹節聞之驚起白帝曰

亮者十七人唾血共盟誅武等曹節聞之驚起白帝曰

外間切切請出御德陽前殿令帝拔劍踊躍使乳母趙

嬈等擁衛左右取榮信閉諸禁門召尚書官屬脅以白

刃使作詔板拜王甫為黃門令持節至北寺獄收尹勳  
山冰冰疑不受詔甫格殺之遂害勳出鄭鳳還共劫太  
后奪璽書令中謁者守南宮閉門絕復道使鄭鳳等持  
節及侍御史謁者捕收武等武不受詔馳入步兵營與  
紹共射殺使者召會北軍五校士數千人屯都亭下命  
軍士曰黃門常侍反盡力者封侯重賞詔以少府周靖  
行車騎將軍加節與護匈奴中郎將張奐率五營士討  
武夜漏盡王甫將虎賁羽林廢駟都候劍戟士合千餘  
人出屯朱雀掖門與奐等合明旦悉軍闕下與武對陳  
甫兵漸盛使其士大呼武軍日竇武反汝皆禁兵當宿

通鑑纂要

卷之四十九

人物忠義

三

衛宮省何故隨反者乎先降有賞營府素畏服中官于  
是武軍稍稍歸苗自旦至食時兵降略盡武紹走諸軍  
追圍之皆自殺梟首降陽都亭收捕宗親  
賓客姻屬悉誅之及劉瑜馮述皆夷其族

臧洪字子源廣陵射陽人年十五以父功拜童子郎知  
名太學洪體貌魁梧有異姿舉孝廉補卽邱長中平末  
棄官還家太守張超請爲功曹時董卓弑帝圖危社稷  
洪說超曰曠府歷世受恩兄弟並據大郡今王室將危  
賊臣虎視此誠義士效命之秋也今郡境尙全吏人殷  
富若動桴鼓可得萬人以此誅除國賊爲天下唱義不  
亦宜乎超然其言與洪西至陳畱見兄邈計事邈先謂  
超曰聞弟爲郡委政臧洪洪者何如人超曰臧洪海內  
奇士才略智數不比于超矣邈卽引洪與語大異之乃  
使詣兗州刺史劉岱豫州刺史孔伷遂皆相善邈旣先  
有謀約會超至定議乃與諸牧守大會酸棗設壇場將  
盟旣而更相辭讓莫敢先登咸共推洪洪乃攝衣升壇  
操血而盟曰漢室不幸皇綱失統賊臣董卓乘釁縱害  
禍加至尊毒流百姓大懼淪喪社稷翦覆四海兗州刺  
史岱豫州刺史伷陳畱太守邈東郡太守瑁廣陵太守  
超等糾合義兵並赴國難凡我同盟齊心一力以致臣  
節隕首喪元必無二志有渝此盟俾墜其命無克遺育  
皇天后土祖宗明靈實皆鑑之洪辭氣慷慨聞其言者

無不激揚自是之後諸軍各懷遲疑莫適先進遂使糧  
儲單竭兵眾乖散時討虜校尉公孫瓚與大司馬劉虞  
有隙超乃遣洪詣虞共謀其難行至河間而值幽冀交  
兵行途阻絕因寓于袁紹紹見洪甚奇之與結友好以  
洪領青州刺史任事二年袁紹憚其能徙爲東郡太守  
都東武陽時曹操圍張超于雍邱甚危急超謂軍吏曰  
今日之事唯有臧洪必來救我或曰袁曹方穆而洪爲  
紹所用恐不能敗好遠來違福取禍超曰子源天下義  
士終非背本者也或見制強力不相及耳洪始聞超圍  
乃徒跣號泣並勒所領將赴其難自以眾弱從紹請兵  
而紹竟不聽之超遂城陷張氏族滅洪由是怨紹絕不  
與通紹興兵圍之歷年不下使洪邑人陳琳以書譬洪  
示其禍福責以恩義洪答曰僕小人也本乏志用中因  
行役特蒙傾蓋恩深分厚遂竊大州寧樂今日自還接  
刃乎每登城臨兵觀主人之旗鼓瞻望帳幄感故友之  
周旋撫弦擲矢不覺涕流之覆面也何者自以輔佐主  
人無以爲悔主人相接過絕等倫受任之初志同大事  
掃清寇逆共尊王室豈悟本州被侵郡將邁屣請師見  
拒辭行被拘使洪故君遂至淪滅區區微節無所獲申  
豈得復全求友之道重虧忠孝之名乎所以忍悲揮戈

收淚告絕若使主人少垂古人忠恕之情來者側席去者克已則僕抗季札之志不爲今日之戰矣昔張景明登壇唾血奉辭奔走卒使韓馥讓印主人得地後但以拜章朝主賜爵獲傳之故不蒙觀過之貸而受夷滅之禍呂奉先討卓來奔請兵不獲告去何罪復見斫刺劉子璜奉使踰時辭不獲命畏君懷親以詐求歸可謂有志忠孝無損霸道亦復僵尸麾下不蒙虧除慕進者蒙榮違意者被戮此乃主人之利非遊士之願也是以鑒戒前人守死窮城亦以君子之違不適敵國故也足下當見久圍不解救兵未至感婚姻之義推平生之好以爲屈節而苟生勝守義而傾覆也昔晏嬰不降志于白刃南史不曲筆以求存故身傳圖象名垂後世况僕據金城之固驅士人之力散三年之畜以爲一年之資匡困補乏以悅天下何圖築室反耕哉但懼秋風揚塵伯珪馬首南向張揚飛燕旅力作難北鄙將告倒懸之急股肱奏乞歸之記耳主人當鑒戒曹輩反旌退師何宜久辱盛怒暴威于吾城之下哉足下譏吾恃黑山以爲救獨不念黃巾之合從耶昔高祖取彭城于鉅野光武創基兆于綠林卒能龍飛受命中興帝業苟可輔主興化夫何嫌哉况僕親奉璽書與之從事行矣孔璋足下



徵利于境外臧洪投命于君親吾子託身于盟主臧洪策命于長安子謂余身死而名滅僕亦笑子生死而無聞焉紹見洪書知無降意增兵急攻城中糧盡外無援救洪自度不免呼吏士謂曰袁紹無道所圖不軌且不救洪郡將洪于大義不得不死念諸君無事空與此禍可先城未破將妻子出將吏皆垂泣曰明府之于袁氏本無怨隙今爲郡將之故自致危困吏人何忍當捨明府去也初尙掘鼠煮筋角後無所復食主簿啟內廚米三斗請稍爲饘粥洪曰何能獨甘此耶使爲薄糜徧班士庶又殺其愛妾以食兵將兵將咸流涕無能仰視男女七八十人相枕而死莫有離叛城陷生執洪紹盛帷幔大會諸將見洪謂曰臧洪何相負若是今日服未洪據地瞋目曰諸袁事漢四世五公可謂受恩今王室衰弱無扶翼之意而欲因際會缺望非冀多殺忠良以立姦威洪親見將軍呼張陳畱爲兄則洪府君亦宜爲弟而不能同心戮力爲國除害坐擁兵眾觀人屠滅惜洪力劣不能推刃爲天下報仇何爲服乎紹本愛洪意欲屈服赦之見其辭切知終不爲用乃命殺焉洪邑人陳容少爲諸生親慕于洪隨爲東郡丞先城未破洪使歸紹時容在坐見洪當死起謂紹將軍舉大事欲爲天下

除暴而專先誅忠義豈合天意臧洪發舉為郡將奈何  
 殺之紹慙使人牽出謂曰汝非臧洪疇空復爾為容顧  
 曰夫仁義豈有常所蹈之則為君子背之則為小人今  
 曰寧與臧洪同日死不與將軍同日生也遂復見殺在  
 紹坐者無不歎息竊相謂曰如何一日戮二烈士先是  
 洪遣司馬二人出求救于呂布比還城已陷皆赴敵死

後漢書五十八 袁宏後漢紀云洪辭氣慷慨涕泣橫  
 下聞其言者雖卒伍所養莫不激揚卓兵強莫敢先進  
 喟然曰舉義兵誅暴亂今眾已合諸君何疑而後使董  
 卓聞山東兵起倚王室之尊據二周之險東向以臨天  
 下雖以無道行之猶足以為患今焚燒宮室劫遷天子  
 海內震動不知所歸此天亡之時也一戰而天下定矣  
 不可失也

蔣子文廣陵人嗜酒好色佻達嘗自謂精骨死當為神  
 漢末為秣陵尉逐賊至鍾山下賊擊傷額因解綬縛之  
 有頃遂死吳先主封為中都侯次弟子緒為長水校尉  
 皆加綬為立廟堂轉號鍾山以表其靈今建康東北蔣  
 山是也法苑珠林 舊志精骨作  
 骨青中都侯作都中侯

晉

戴若思廣陵人祖烈吳左將軍父昌會稽太守若思有  
 風儀性閑爽少好遊俠不拘操行嘗在江淮間劫掠商  
 旅遇陸機赴洛船裝甚盛遂與其徒掠之若思獨在岸  
 據胡牀指揮左右皆得其宜機察之知非常人登舫屋

遙謂之曰卿才器如此乃復作刼耶若思感悟因流涕投劍就機機與言深賞異之遂定交焉後舉孝廉入洛機薦之于趙王倫曰蓋聞繁弱登御然後高墉之功顯孤竹在肆然後降神之曲成是以高世之主必假遠邇之器蘊匱之才思託太音之和伏見處士廣陵戴若思清冲履道德量允塞思理足以研幽才鑒足以辯物安窮樂志無風塵之慕砥節立行有井渫之潔誠東南之遺寶宰朝之奇璞也若得託迹康衢則能結軌驥騶躍質廊廟必能垂光璣璠矣惟明公垂神採察不使忠允之言以人而廢倫乃辟之除沁水令不就後爲東海王越軍諮祭酒出補豫章太守以討賊有功錫爵秣陵侯累官征西將軍都督兗豫幽冀雍并六州諸軍事假節加散騎常侍發投刺王官千人爲軍吏調揚州百姓家奴萬人爲兵配之以散騎常侍王遐爲軍司鎮壽陽與劉隗同出至合肥而王敦舉兵詔追還鎮京都進驃騎將軍與右衛將軍郭逸夾道築壘于大桁之北尋而石頭失守若思與諸軍攻敦爲敦所敗率麾下百餘人赴官受詔與公卿百官於石頭見敦敦問若思曰前日之戰有餘力乎若思曰豈敢有餘但力不足耳又曰吾此舉動天下以爲如何若思曰見形者謂之逆體誠者謂

之忠敦曰卿可謂能言敦參軍呂猗昔爲臺郎性姦諂若思爲尙書惡之至是乃說敦曰周顛戴若思皆有高名足以惑眾近者之言會無愧色公若不除恐爲將來憂耳敦以爲然又素忌之俄而遣鄧嶽繆坦收而害之若思素有重望四海之士莫不痛惜焉敦平冊贈右光祿大夫儀同三司諡曰簡

晉書六十九 高祖諱 劉隗傳云初隗以

王敦威權太盛終不可制勸帝出心腹以鎮方隅故以譙王丞爲湘州續用隗及戴若思爲都督

宋

梁曠廣陵人山陽內史誕執其妻子遣使要曠曠斬使拒之誕怒滅其家沈慶之率軍進攻追及誕殺之嘉梁

曠誠節擢爲後將軍

見宋書七十九 竟陵王誕傳

梁

來疑字德山廣陵人幼有奇節兼資文武侯景陷臺城廣陵太守祖皓在城中將見害乃逃歸江西時景遣董紹先襲廣陵卽以紹先爲南兗州刺史百姓感皓遺惠每相蔽匿疑乃說皓曰逆豎滔天王室如燬正是義夫發憤之秋志士忘軀之日府君荷恩重而又不爲賊所容今逃竄草間知者非一危亾之甚累棊非喻董紹先雖景之心腹輕而無謀新尅此州人情不附襲而殺之此一壯士之任耳今若糾率義勇立可得三二百人意

欲奉戴府君勦除凶逆遠近義徒自當投赴如其尅捷  
 可立桓文之勲必天未悔禍事生理外百代之下猶爲  
 梁室忠臣若何皓曰僕所願也死且甘心簡文帝大寶  
 元年正月癸酉前江都令祖皓起義疑爲要勇士耿光  
 等百餘人襲殺紹先推前太子舍人蕭勔爲刺史結東  
 魏爲援馳檄遠近邵陵王綸入援集南岸承制除疑步  
 兵校尉秦郡太守封永寧縣侯與皓舉義討景景懼率  
 侯子鑒等攻之二月癸未城陷疑并兄弟子姪遇害者

十六人子法敏逃免仕陳爲海陵令

見南史文學傳暨  
梁書簡文帝本紀

吳景傳 按三國六朝時以江南爲江東以江北爲江  
 西吳志建安十八年廬江九江斬春廣陵戶十餘萬皆

東渡江江西遂虛然則廣陵亦稱江西矣臺城在江東  
 皓適在彼故云在城中謂在臺城中也逃歸江西卽逃  
 歸廣陵也

隋

來護兒字崇善祖崩始徙廣陵爲江都人父繪護兒幼  
 卓詭好立奇節讀詩至擊鼓其鏜踊躍用兵羔裘豹飾  
 孔武有力舍書歎曰大丈夫在世當如是會爲國滅賊  
 以取功名安能區區久事隴畝護兒所住白土村密邇  
 江岸于時江南尙阻賀若弼鎮壽州常令護兒爲間諜  
 授大都督平陳之役護兒有功焉進位上開府從楊素  
 擊高智慧于浙江賊據岸爲營周亘百餘里船艦被江

素令護兒率數百輕艤徑登江岸直拚其營破之賊潰散護兒追至泉州智慧窮蹙遁去閩越進位大將軍除泉州刺史時有盛道延擁兵作亂侵擾州境護兒進擊破之又破汪文進于黟歙進位柱國累遷右驍衛大將軍大業六年從駕江都賜物千段令上千人豕宴父老州里榮之數歲轉右翊衛大將軍遼東之役護兒率樓船指滄海入自浪水去平壤六十里與高麗相遇進擊大破之乘勝直造城下破其郭郭明年又出滄海道師次東萊會楊元感作逆勒兵與宇文述等擊破之封榮國公邑二千戶十年又率師渡海至卑奢城高麗舉國

來戰大破之斬首千餘級將趨平壤高元震懼遣使上表請降煬帝遣人持節詔護兒旋師十三年轉為左翊衛大將軍進位開府儀同三司委任愈密江都之難宇文化及忌而害之長子楷以父軍功授散騎朝散大夫楷弟宏仕至果毅郎將金紫光祿大夫宏弟整虎賁郎將右光祿大夫整尤驍勇善撫士眾討擊羣盜所向皆捷諸賊甚憚之為作歌曰長白山頭百戰場十五五把長槍不畏官軍千萬眾只畏榮公第六郎化及反皆

遇害惟少子恒濟獲免

隋書六十四護兒係繪子本唐書宰相世系表甘泉縣志以

護兒為法敏子非隋煬帝集降來護兒璽書云公旋師之時是朕勅公之日君臣意合遠同符契梟此元惡

重修揚州府志 卷之四十九  
期在不遙勒名太  
常非公而誰也

唐

來濟篤志爲文章善議論曉暢時務擢進士貞觀中累  
遷通事舍人太子承乾敗太宗問侍臣何以處之莫敢  
對濟曰陛下上不失爲慈父太子得盡天年則善帝納  
之除考功員外郎十八年初置大子司議郎高其選而  
以濟爲之兼崇賢館直學士遷中書舍人永徽二年拜  
中書侍郎兼宏文館學士監修國史俄同中書門下三  
品封南陽縣男遷中書令檢校吏部尙書帝將以武氏  
爲后濟諫曰王者立后以承宗廟母天下宜擇禮義名

家幽閒令淑者副四海之望稱神祇之意故文王與妣  
關雎之化蒙被百姓其福如彼成帝縱欲以婢爲后皇  
統中微其禍如此惟陛下詳察初武氏被寵特號宸妃  
濟與韓瑗諫妃有常貞今別立號不可武氏已立不自  
安后更謾言濟等忠鯁恐前經執奏輒懷反仄請加賞  
慰而實銜之帝示濟及瑗濟等益懼顯慶初兼太子賓  
客進爵爲侯帝問馭下所宜濟曰昔齊桓公出遊見老  
人命之食曰請遺天下食遺之衣曰請遺天下衣公曰  
吾府庫有限安得而給老人曰春不奪農時卽有食夏  
不奪蠶工卽有衣由是言之省徭役馭下之宜也是時

山東役丁歲別數萬人又議取庸以償雇紛然煩擾故對及之二年兼詹事尋坐褚遂良事貶台州刺史久之徙庭州龍朔二年突厥入寇濟總兵拒之謂其歎曰吾嘗絀刑罔蒙赦死今當以身塞責遂不介冑而馳賊沒焉年五十三贈楚州刺史給靈輜還鄉濟異母兄恒上元中為黃門侍郎同中書門下三品以學行稱恒子景業虞部郎中濟二子敬業潤州刺史慶遠中書舍人唐見書一百五暨宰相世系表按褚遂良傳顯慶二年徙桂州未幾貶愛州刺史韓瑗傳云顯慶二年許敬宗李義府奏瑗以桂州授遂良桂州用武地倚之謀不軌於是貶振州刺史高宗紀顯慶二年八月丁卯貶韓瑗為振州刺史來濟為台州刺史此傳言坐遂良事蓋敬宗義府譖瑗亦譖濟故二人同日貶而遂良亦貶愛州也

唐詩紀事濟出玉關絕句云斂轡遵龍漠街悽出玉關今日流沙外垂涕念生還

上官儀字游韶陝州陝人父宏為隋江都宮副監大業末為陳稜所殺時儀幼左右匿免冒為沙門服寢工文詞涉貫墳典貞觀初擢進士第召授宏文館直學士遷祕書郎太宗每屬文遣儀視藁宴私未嘗不預轉起居郎高宗即位為祕書少監進西臺侍郎同東西臺三品時以雍州司士參軍韋絢為殿中侍御史或疑非遷儀曰此野人語耳御史供奉赤墀下接武夔龍筵羽鶴鷺豈雍州判佐比乎時以為清言儀工詩其詞綺錯婉媚及貴顯人多效之謂為上官體麟德元年坐梁王忠事



下獄死籍其家初武后得志遂牽制帝專威福帝不能  
 堪又引道士行厭勝中人王伏勝發之帝因大怒將廢  
 為庶人名儀與議儀曰皇后專恣海內失望宜廢之以  
 順人心帝使草詔左右奔告后后自申訴帝乃悔又恐  
 后怨恚乃曰上官儀教我后由是深惡儀始忠為陳王  
 時儀為諮議與王伏勝同府至是許敬宗構儀與忠謀  
 大逆后志也子庭芝歷周王府屬亦被殺庭芝女中宗  
 時為昭容追贈儀為中書令秦州都督楚國公庭芝黃  
 門侍郎岐州刺史天水郡公以禮改葬唐書一百五  
 宰相世系表云  
 宏為江都總監徙揚州高宗紀云顯慶元年廢皇太  
 子為梁王五年廢梁王忠為庶人麟德元年十二月丙  
 戌殺上官儀戊子殺庶人忠燕王忠傳云貞觀二十年  
 始王陳永徽初拜雍州牧王皇后無子立為皇太子后  
 廢武后子宏甫三歲許敬宗希后旨建言國有正嫡太  
 子宜同漢劉彊故事於是降封梁王梁州都督俄徙房  
 州刺史廢為庶人囚黔州承乾故宅麟德初宦者王伏  
 勝得罪武后敬宗乃誣忠及上官儀與伏勝謀反賜死

宋

沈攸字子宜揚子人建炎三年賊邵青犯真州攸攝楊  
 子簿以狀白府乞以所糾士兵禦之賊勢張甚攸挺身  
 拒敵北門死之嘉靖志 按宋史高宗紀  
 是年二月金人入真州  
 唐璟字用章揚子東鄉人父霆紹興間嘗領鄉兵拒敵  
 馬鞍山獲功補官開禧間金兵攻六合及儀徵將指淮  
 陽璟以民兵總轄親率子弟及所部強壯斷橋填堰謀

決陳公塘以拒之時塘隸轉運使擅決者罪且死眾欲請之官璟曰必待關白豈能及事乎乃決其水俾東與句城塘會接揚州城南西運儀徵南際運河北距岡隴平原曠野不日而成巨浸敵騎登焦家山望遂驚去州賴以免郡守以聞將命之官會疾不就後權和州倅金

人屠城遇害事聞贈官錄其子弟儀徵縣志 宋史忠義宋昌祚傳云建炎

二年兀朮犯和州州人推昌祚權領軍事率眾堅守金人圍之數日軍士胡廣發弩中兀朮左臂兀朮大怒飛炮雨集徑登弩發之地城立破金人入屠其城昌祚與權倅唐璟皆死譙樓上磔裂以徇

吳駿發江都人少遊鄉校卽有投筆之志紹定間李全攻城郡守募良家子守禦駿發與其黨應之賊平以白

衣補將校金人入境又以轉戰功累遷鎮江右軍統領

元兵據盱眙大使賈似道遣兵攻之駿發與偏裨爲前鋒勇氣百倍會元援兵至駿發死之事聞賜恤甚厚雍正

志引南畿志

張炎字汝玉廣陵人身七尺長鬣倜儻有節概補州牙兵隨制置李庭芝潰圍赴行在追者及之麾下鳥獸散

炎獨鬪死杜本谷音

嵇聳高郵嵇莊人宋末爲統制官以水爲砦助官軍拒元子德潤姪昌館客莆田林希驥字千里林孔時字願

學皆銳意於事功者也德祐二年十二月庚申以柳岳

為工部侍郎洪雷震一作儒震為右正言使燕祈請明年二

月六日元軍載岳雷震併輜重俱北嵇聳率莊兵擊其

前高郵兵擊其腰元軍大敗柳岳死雷震止於高郵元

入江淮以來惟此戰宋師大勝三月二日丞相文天祥

被逐于真州變姓名載竹畚中潛至高郵不敢入緣城

子河至嵇莊聳設醴甚至使德潤與林孔時送至泰州

始航海達閩文文山集 舊志云柳岳奉降表於元道

云彼柳生今甲顏乃北面於雒戎賣吾君其奚忍幸于

里今途窮凜若人兮奮劍顛白日今當空揮伎首於一

擲竭草野之孤忠按岳奉命祈請必由伯顏處馳送不

應迂道至嵇莊考指南錄則元軍載岳北行本由入燕

大道橋莊兵與高郵兵夾攻之元軍敗而岳乃死時提

刑司答義緒一正置司高郵後殉節死者也觀洪雷震

止于高郵則必禱止之而岳之死則未知殺于亂軍抑

禽而殺之也俗傳柳岳微服宿于嵇莊聳疑其形跡醉

而索得其降表斷其首埋之因稱所謂柳壩者即埋柳

之所不知柳之入燕非如文文山赴閩故微服變

姓名柳岳內奉太后旨外通于伯顏無容微服者也嵇

莊者文山自城子河舟行二十里至夜始及之在高郵

東南岳行所不必經過者也舊志未詳而

程辭亦似緣於俗說今依指南錄考正

元

李徵臣揚州人元時翰林待詔洪武中不屈家屬盡死

仍不屈謫戍寧夏類書 纂要

劉秉中高郵人進士拜兩浙行臺御史為人剛直果決

時方國珍叛秉中懷印走大都遇害高郵州志 案元

史臺統浙東浙西等處始治揚州後移杭州又徙江州

後移治建業建業破移治紹興方國珍劫掠海上止在

溫台一帶並無陷杭之事先後討國珍之人皆無秉中所云懷印走大都不知在何時在何地且即奉詔討賊亦惟遁歸行臺不應走大都國珍執朶班只兒也忒迷失等亦惟勒請招降即泰不華之死始亦欲抱持之不華奮殺始罹于難秉中既將走何以遇害惜舊志率略使其事不詳及考范惟恭隆慶高郵志則稱秉中以元進士歸明授兩浙行省御史死于方國珍之叛乃元以燕京為大都秉中既歸明何又欲走燕京國珍叛明並志于此以俟知者

王信字國寶父瑄元末為淮南北義兵都元帥田豐作亂信從察罕帖木兒大破之還鎮沂州領沂國公印授江淮中書省平章政事明太祖命其甥顧師魯致書帛往說之不就羈師魯欲殺之徐達師至淮安復使人說

瑄瑄佯許降太祖密諭達令勒兵趨沂州觀變達至沂又約瑄瑄又佯許之而閉門堅拒達遂進兵攻破其城勒瑄招降信瑄陰遣家將鄧春從間道語信且命之曰兒當奮臂一呼以報國恩以雪父恥無以余為念而以偽書付使者信殺使者罵不絕口達遂殺瑄信走山西

陰集兵再舉不遂避跡于興化以憂憤卒雍正志引興化舊志案元史順帝紀至正十八年義兵萬戶王信以滕州叛降於毛貴二十七年三月廓擴帖木兒遣兵屯滕州以禦

王信八月詔曰廓擴帖木兒領本部軍馬自潼關以東肅清江淮李思齊統本部軍馬自鳳翔以西進取川蜀王信本部軍馬固守信地別聽調遣十月以淮南行省平章政事王信為山東行省平章政事兼知行樞密院事加司徒淮南行省平章政事王信為沂國公十一月王午大明兵取沂州守臣王信遁其父宣被執徐達傳云師行克沂州降守將王宣進擊嶧州王宣復叛擊斬之又元史察罕帖木兒傳云二十二年田豐王士誠陰

結賊復圖叛乃請察罕帖木兒行觀營壘以爲不可  
往察罕帖木兒不許從輕騎十有一人行至王信營又  
至豐營遂爲王士誠所刺統諸云云與  
舊志所載迥不相合錄於此以俟考

張士德小字九六善戰有謀能得士心浙西地皆其所

略定既被禽太祖欲畱士德以招士誠士德間道貽士

誠書俾降元士德在金陵竟不食死見明史一百二十  
三張士誠傳案

明史於士誠傳中大書士德之死顯以劉仁贍  
孫晟待之矣仿歐公五代史之義附見於此

明

樂鳳字秉德高郵人從明太祖與孫炎汪廣洋等同直

中書省督運宣徽嘗同廣洋使廣陵見故鄉殘破廣洋

馬上發爲詩歌云同爲故鄉人同入故鄉里雖無故鄉

親還飲故鄉水城郭烟火餘笳鼓連雲起聊以一杯酒

酒向松柏裏昔爲歌舞地今爲爭戰場與君騎瘦馬聯

轡踏斜陽荒草侵合路苦蒿生過墻遙憐鮑明遠詞賦

最淒涼已亥明取諸暨州改名諸全令鳳知州事有能

聲張士誠遣其弟士信寇諸全鳳與院判謝再興分門

守數出奇兵挫敵夜半出敵不意砍士信營破走之是時

胡大海爲苗將蔣英所害張士誠聞浙東亂故遣其弟  
寇諸全而大海養子德濟自信州往救乘懈入城遂與

鳳等再興使部校鬻貨於杭太祖慮其輸軍中虛實召

再興還而以參軍李夢庚總制諸全軍馬先是元諸暨

州知州陳大倫以兵亂絕意進仕鳳慕其賢與夢庚謀

迎之事以師禮會明祖念再興功復遣守諸全再興忿  
夢庚出己上鳳復以細故繩之遂叛殺鳳鳳妻王氏以  
身蔽鳳並殺之執夢庚降士誠夢庚亦死之明祖以再  
興數有功叛非其志故鳳與夢庚皆不得恤見明史一百三十三  
胡大海傳暨汪廣洋鳳池吟稿宋濂文集案舊府志及高郵志皆列樂鳳於元且稱方國珍作亂守將謝再興謀襲城以應之今依明史改正

王鼎儀真人初為趙忠養子忠為總管克太平授行樞  
密院判鎮池州趙普勝來寇忠陣歿鼎嗣職復故姓駐  
太平庚子閏五月陳友諒以舟師來寇雲與元帥朱文  
遜知府許瑗院判王鼎結陣迎戰文遜戰死賊戰攻三日不得入以巨舟乘漲緣舟尾攀堞而上城陷鼎抗罵

死太祖即吳王位追封鼎太原郡侯立忠臣祠祀之見明史

史忠義花雲傳

顧師勝字惟賢興化人洪武十二年由辟薦知四川眉

縣事川賊天龍保作亂謀襲城師勝率兵禦之賊勢猖

獗師勝親督兵於三橋鋪與賊力戰屢敗之因追賊下

阪馬傷足被刺露腸而死事聞贈奉議大夫眉州知府

見明史忠義孫炎傳

于光字德剛泰州人初為蘭州指揮使洪武二年擴廓

帖木兒寇蘭州光力戰死之明年春太祖命分道北征

大破擴廓兵詔贈光昭毅將軍以其子彥真襲職節略

郭任江都人建文時為戶部侍郎靖難兵至被執不屈

死裔孫永寧以進士官御史後有名梁者生明季以孝

友稱年八十八舉鄉飲賓江都縣志案朱鷺建文書

吏才居戶部調兵食軍興不之嘗上疏曰天下事先本

後未除惡不去本臣未見為得也今日儲財粟以備軍

實果何為者然乃北討周南討湘舍本不圖而圖末可

謂戢亂平且兵貴神速苟持久寧耐彼勢已就有坐困

耳文皇聞而惡之革命日任不屈死之子經亦坐死少

子金山保成廣西女三配象奴嘉靖中鎮江知府劉儲

秀祠祀其鄉明史附見卓敬傳稱郭任丹徒人或曰定

遠人則存疑未定之詞桑牙壽郭自瞻文公云元季明

初民生銷於鋒鏑土著舊族相傳十八家郭氏其一焉

司農侍御以忠直顯其居在舊城南北通衢之中司農

謂任侍御謂永寧自瞻則梁之孫也萬厯志列郭任於

江都舊志皆從之廣陵之族若李植籍大同高那佐籍

襄陵而皆揚州人任亦其類也依舊志仍列於此

王岳興化人素剛直侍武宗於東宮正德中任印

太監坐厥數日中外肅然頗惡其儕輩所為韓文等

誅逆瑾岳內為之助奏言朝官論劾不可不從上允之

事泄瑾矯詔賜死於臨清天下冤之嘉靖初錄其後世

襲錦衣衛百戶論者方之漢呂彊云興化縣志

成諧字和仲興化人少補邑諸生倣儻負奇節好佩刀

劍學六壬遁甲之術嘗自詫當立功異域久之總督翁

萬達招置幕府與河南諸生王邦直皆見倚重嘉靖二

十四年大同有警諧以鐵裹門鷄鳴峪係諸邊要害勒

兵備之敵從隍中入與邦直合殲其半敵憤恚合左右  
部落數萬人環七市圍之相持一日矢石俱盡援兵不  
至與邦直俱戰死事聞贈指揮僉事蔭一子世襲百戶  
立祠於陽和賜額曰奮忠諧死時年三十妻沈善屬文  
有節操子嘉謨襲爵嘉猷邑諸生諧所著有斗野集海

一覽

原文疑有脫字

孫子陣法新說車戰諸篇行於世

康熙志

張恒江都人世襲揚州衛指揮使恒長身廣額負膽略  
善談論能拊士卒累官淮陽參將致仕嘉靖三十五年  
倭由通泰犯揚州撫按卽家起之賊薄城而攻恒與千  
百羅大爵百戶曾折率兵禦之賊設覆教場後門以數  
人挑戰覆發恒與大爵沂皆及於難賊平以恒非見任  
官不以聞萬厯中巡撫白其事始以恒從祠報功春秋

子祭

雍正志在嘉靖

案明史倭犯揚州三十六年是年丁巳

高燭江都人嘉靖三十二年進士授錦衣衛千戶死難

贈指揮世襲千戶

見太平坊高氏族譜所稱死難未詳本末

案

丁効恭寶應人膂力過人嘗兩手擎兩牡豕挂梁上攫  
一二百斤石如轉丸嘉靖三十六年倭寇從海上突犯  
揚州長驅而北是時寶應無城居民空縣避之効恭笑  
曰何邑中無一丈夫耶遂結里中數十人持長戟挾利  
刃迎擊南郭外隄上揮刃連斃數寇寇將卻會鬪久飢



真修志卷之四十九  
倦少年輩事起倉卒無紀律眾稍退寇伏起大呼効恭  
遂爲所害有花榮者善騎射里有盜數百剽掠鄉邑民  
苦之榮與郁信甫募民兵協力掩捕與盜抗發弩中其  
魁袁九四胸擒之餘黨悉平以捕盜功榮授安豐鎮巡  
檢信甫授時保鎮巡檢人物攷 寶應縣志云効恭兄  
効寬邑諸生也哭弟甚哀抑鬱  
卒以

陳輔堯字華山江都人生負英略有才名中萬厯十六  
年鄉試上春官不第赴選授長寧縣令至則惠政廉聲  
噪動兩粵攝博羅篆廉益著兩臺交薦調歸善長博人  
公謁遮道爭欲借堯以爲長頃有旨實授歸善兼攝長  
博以一身往來三邑無畱牘無冤獄苞苴不行百廢畢

興六年報最舉天下治平第一出守膠州五閱月移貳  
永平視芻遼左會難臨卽死之事聞贈按察使司僉事

諡忠烈廕一子建祠崇祀子夢乙彰德通判耿介有父

康熙志 廣東通志云陳輔堯萬厯四十一年任歸  
善四十二年任長寧則先歸後長明史忠義崔儒秀  
傳云轉餉出關與自在知州段展駐瀋陽天啟元年瀋  
陽破輔堯方奉命印烙左右以無守土責勸之去輔堯  
日孰非封疆臣何去  
爲望闕拜拔刀自刎

高邦佐字以道號衷白山西襄陵籍先世以鹽筴入淮  
南遂隸江都萬厯二十三年聯捷進士授山東壽光縣  
清慎視事設官莊二十八所招撫流移三千家捐俸買

犢勸耕墾荒田五千餘畝庚子擢戶部主事再轉員外郎管中南倉遷永平知府濬灤河築長隄裁抑稅使高淮不敢大橫庚戌遷天津兵備副使稅使馬堂亦如高淮橫縛其奴宋瑗等民以安又平劇盜董時耀癸丑轉陝西參政督兵神木屢破套寇沙計核空糧入正餉丁嫡母邢淑人艱服闋以原秩補薊州道以調兵與撫臣意相左被劾歸奉母家居天啟元年遼陽破起參政分守廣寧以母年八十餘泣涕不忍去母責以大義乃行但以兩僕自隨屬家人勿寄書以亂人意時撫臣王化貞與經臣熊廷弼議不合邦佐知事必敗累乞歸方允而化貞棄廣寧走將詣廷弼乞師二僕高永高厚及千總盧科說邦佐曰前此請告已報允可卸罪自免邦佐曰不可一日未去官一日爲廣寧守無所之也夜修書與母復朱筆作批文曰本道奉命分巡廣寧家有九旬之母絕裾出山抵任以來胼胝勩寢食俱廢意圖仰報君父不意三忿失守本道於正月二十二日馳赴松山惟有一死以殉封疆西向叩闕南向拜母自經公署以明臣節外所隨任家僮二人遣還原籍報信誠恐甲馬紛馳之會關津阻隘合給印批遂馳右屯謁廷弼言城中雖亂敵尙未知提兵入城斬一二人人心自定公

卽不行請授邦佐兵赴難廷弼不納謂二僕曰我義不  
偷生好收吾骨歸里以見吾母葬吾父墓側知死事兒  
魂魄相依也二僕泣曰我等受主厚恩亦生死共之邦  
佐曰爾等無相累藉爾輩寄吾語歸遂更衣以印綬自  
縊死永謂厚曰吾不忍主人獨死地下無使令主人身  
後事在汝汝卽負我莫負主人速爲行計厚曰我年幼  
未諳歸途當從主人死永曰吾志已決爾毋負我言亦  
作家書付厚扃其門自縊于邦佐榻下天啟二年正月  
二十四日也盧科慟哭謂厚曰我一家十二口在廣寧  
俱自殺感公之德棄家相隨欲護之入關而今已矣當  
忍死伴汝抵家不食公遺命遂與厚詣廷弼請斂邦佐  
屍廷弼曰爾主不欲生入關肯死入關乎命軍士以柴  
千束并公署焚之邦佐與永屍俱燬于火厚又泣告廷  
弼求一馬亦不給乃徒步數千里由京師至揚皮骨僅  
存訊其事哽咽不能悉吐發家書惟以不能復地爲恨  
母聞訃哭之哀旣而曰不愧爲臣卽不愧爲子兒得死  
所可無憾也事聞特下旨曰高邦佐以身殉難足愧偷  
生從重卹錄遂贈光祿寺卿加贈太僕卿賜祭葬諡忠  
節廕一子錦衣百戶永家計頗饒有妻尙無子厚年僅  
十九科狀貌魁梧多力厚所以得達者科之力也子瞻

字孔昭以廕為錦衣衛指揮僉事每論大獄多平反忤中貴人罷歸子文瀾字溯從初名堅例當廕部臣以聞莊烈帝覽狀泣然曰此松山死難高某孫耶詔改今名

高氏褒忠錄 陳繼儒忠義紀略二僕說邦佐及作家書在乞師不許後考行狀二十一日作家書二十二日赴松山二十四死則預為家書死志已定

倪可大字簡白儀真樸樹灣人少剛正有文名以歲貢授霍邱訓導日延諸生於明倫堂講學謂儒者立身以忠孝為大詞章非所重崇禎八年正月流寇東下縣令黃日芳適考滿預請以城守屬可大可大初不知也頃賊至圍城城邑凋敝素無精械可大概然任之即啟符印西北向再拜酌酒誓師親擐甲執桴鼓督民壯千餘人避實擊虛斬賊數百級賊少卻時北門當賊衝可大守之教諭史士林守南門賊偵知城內無火器以巨礮攻南門士林逃去城遂陷賊首羅汝才高如岳恨可大格殺其眾並趨北門執可大於元帝宮可大不屈賊叱可大亦叱嚙指血噴賊面罵不絕口遂遇害妻戴氏與未笄女皆自經死僕倪表從死舉家死者十一人事聞贈國子監學錄霍邱人每畫見可大于北門內外異之

立祠祀焉儀徵志云戴氏方雉經賊將取其手釧以刀斫指指盡落子本彝先已匿免聞之痛呼奮出以身翼蔽母身中三十餘創僵仆眾屍中賊去復甦刀瘢如縷案明史忠義盧謙傳中言賊陷

霍邱縣丞張有俊教諭倪可大訓導何炳死焉何炳爲訓導則可大宜是教諭又有教諭史士林守南門者蓋可大旣攝縣事教諭缺卽以士林攝之耶

郝景春字和滿江都人中萬厯四十年舉人署鹽城教諭坐事罷歸謁部改選祖道時演楊忠愍事太息浮大白曰此奇男子因撰忠愍年譜起爲陝西苑馬寺萬安監錄事量移黃州照磨崇禎十年署黃安縣事甫三日羣賊奄至堅守八日殲賊甚多築靈武臺以備兵患十一年擢房縣時熊文燦已受張獻忠降羅汝才率其黨屯房之東西景春之縣次子鳴鸞從至則請剿不許與賊戰殺數十人賊懼求撫而未決景春單騎入其營與汝才及白貴黑雲祥歆血盟汝才乃降時鄖陽所屬多墟莽景春令民收堡城野粗完賊依之耕牧與居民雜處民日惴惴景春乃與主簿朱邦聞守備楊道選修守具輯諸營與紳士嚴守是冬賊眾漸踞西關告急於文燦不報鳴鸞字子強江都學生力能敵萬人謂父曰吾城當賊衝而羸卒止二百何以守乃環甲詣汝才曰若不念香火盟乎慎毋從亂汝才佯諾鳴鸞覺其僞歸告景春景春與道選授兵登陴文燦檄責景春日朝廷化賊爲民奈何驅民爲賊汝才聞之喜遂沿途屠掠景春使道選率鄉勇擊之傷其魁汝才懼愬於文燦文燦謂

景春壞撫事趣景春駐賊城外使指揮數人至房安插  
指揮居光祖李大捷受賊賂爲賊反間謗景春提督李  
太監使差官呂鳴瑞三人持牌示房縣不得輕啟禍端  
士民大恐城守解散景春申文待罪汝才乃環逼城下  
移踞北關景春不得已遵文燦檄與汝才約畫定疆界  
開集貿易鳴瑞復爲賊間景春歎曰吾數奇不可逃篝  
燈著數奇紀略一卷十二年正月朔賊分踞十五鄉五  
月六日張獻忠殺穀縣知縣阮之鈿反監軍張大經從  
賊爲前鋒至房東門募兵查成龍等擊斬其黨上天龍  
汝才割田中麥以絕城中食景春乞援於文燦十四往  
最後以寸紙血書繫卒髀爲丐狀縋城告急皆不報已  
而賊大至獻忠張白幟汝才張赤幟俄二幟相雜攻城  
張大經以檄喻降大罵碎其檄賊移書要以讓城景春  
怒曰郝老頭可斷城不可讓與鳴鸞守西南角樓俾邦  
聞守東門道選守南門典史王允奎守西門所官張三  
錫守北門城上燃草投石賊多斃賊立雲梯以鉤鉤之  
擊以銃斃數百人賊掘墓取棺戴之首以攻城又負板  
穴城城將圯鳴鸞以火熬油灌之投石擊傷獻忠左足  
殺其所愛馬景春用間入賊壘陰識賊所卧帳將襲擒  
之三錫縋一賊上城北門遂陷道選巷戰死大經紅櫻

白馬手短槍入曰知縣何在獻忠坐縣署兵擁景春至賊起降階迎奉卮酒飲景春景春叱之忽十數騎持令旗馳至曰曹營來救郝知縣擁上馬去時鳴鸞從亂軍失散而僕人陳宜與邦聞散髮跣足隨之大經喉汝才勸景春降以分其惡景春曰爲求吾兒來賊執旗求之夜二鼓大雨如注傳公子在西南隅天明鳴鸞至大哭景春以手畫頸曰此下亦不甚痛鳴鸞曰兒不見父故悲耳敢不死賊聞皆泣汝才流涕曰公好人姑避去景春曰豈有避賊知縣耶獻忠使賊來索乃往見獻忠大罵獻忠怒時王允奎已見執賊殺之又殺一守備以懼

景春賊問倉庫錢米安在聲甚厲景春叱曰死賊倉庫有物城豈爲汝陷乎大經在旁曰事已至此須識時景春大罵曰汝受朝廷厚恩官九省監軍負國辱親甘從死賊我死必活捉汝賊使卒擁出西門河上鳴鸞痛哭追至景春呼好者再遂遇害鳴鸞朱邦聞陳宜伏屍而罵賊回刃均殺之邦聞一門皆死時崇禎十二年五月二十九日也事聞部擬贈尙寶寺卿以賀逢聖奏改贈太僕寺少卿廕一子入監諭葬金匱山建祠法海寺鳴鸞陳宜耐之長子明龍字雲蒸江都學生始奉祖母居里中以廕入監粗衣蔬食絕意仕進鄉里稱其孝友景

春次女適張伯鯨長子乙酉伯鯨死難女曰吾父兄昔為國死可緩須臾以汙張氏門乎即自縊陳宜宜陵鎮

入郝氏褒忠錄 異香集云公置錢城上指日擊中一賊賞千錢須臾錢盡又斃賊數十百人鳴鸞亦手擊殺數人相持五晝夜賊氣奪撤圍

古道行字達可其先韓城人入籍江都道行為人尚氣節勇敢多力能挽強而最愛士卒山東賊起往應募擊賊散其黨主帥不敘功乃歸崇禎四年中武進士授吳淞守備洋賊自海港乘潮入道行率習流者鳧水手足相鉤弋以前據其舵舟不能動道行躍入手刃賊獲其一舟餘遁去遷密雲遊擊奏請增戍卒于野仙塔浚隄築壘京師謂非所宜言謫潮河川守備地多積木自永樂以來禁民不得採道行取以給軍籍佐食其餘入之二年獻白金四十二萬於朝以能遷石塘參將天津衛弁徐熊飛故無賴多為不法掠官銀四萬事覺亡命匿石塘捕得之疑道行受其金並繫道行欽天監正訟其寃曰道行不愛四十萬而愛罪人之四萬乎得未減罷職丙子吳牲薦起署牆子嶺參將事戊寅陞宿遷副總兵先是內監楊顯忠奏云宿遷當糧運孔道其間七百里與河南鳳泗為肘腋宜招集土人為卒置帥領之於是道行所部卒盡新集而淮北且大饑道行以非素教



習宜撫以寬一切以恩結之財帛與共不私一錢是時  
史可法督糧運巡撫淮南北乘驢間行至宿遷卒不識  
將奪其騎史至官署怒讓道行見道行貌魁梧奇之與  
語道行述生平戰功辭氣不屈史公曰將軍休矣幸後  
無縱兵十四年河南賊袁時中犯睢寧之雙溝眾號二  
十萬遂檄道行往先嘗之道行請曰逆賊所犯雖非道  
行分地亦當爲朝廷擊之然賊眾無援則道行不知死  
所史公曰汝第往吾大軍集援汝道行乃渡河守備周  
雲龍載火礮壯士吳對張豹杜士貴從戴國柱以兵四  
百督糧艘進泖口願與俱擊賊遂至雙溝陣於靈爽廟  
賊夾溝而軍夜暮賊發烏槍軍士來白賊槍無鐵丸將  
與我活仗也是時諸將遇賊不鬪舉空礮相應賊肆掠  
去然後尾之謂之活仗道行奮激曰我爲天子守封疆  
遇賊不殺欲何爲令雲龍納鐵丸槍中自晨及午擊傷  
甚眾賊益集道行與戰三晝夜殺傷過當而所將卒亦  
多死賊見無援兵至圍之數重道行謂其士曰賊來甚  
眾援兵不來爾等得走卽走我死此矣士皆感激不忍  
舍戰益疾死傷殆盡張豹杜士貴與壯士十數人決圍  
翼道行以出道行勒馬顧而太息曰我以七尺軀誓殉  
君國不可去此一步復縱馬入豹士貴皆從入疾鬪手

刃數十人吳對曰公兜鍪有纓賊多向公請去之道行不應對乃以矛刺取道行纓自冠之戰而死賊裂其屍道行被創死之士卒無還者道行所將新集兵合國柱山東兵僅三千人賊以爲遇偏將軍勇悍若此儻前值大軍危矣以故撤圍去不渡淮而南國柱與雲龍亦死從死者又有唐有功李唐吳守恩趙以道唐國柱魏允忠史公聞之往哭其屍極哀欲爲易衣冠而斂身環重鎧血肉浸漬不可更遂裹以納棺中所騎馬歸宿遷哀鳴不食數日死道行死史公甚悔撫其子之棟使在左右乙酉揚州城破有招之棟出者之棟怒曰我身已從史公遂從史公至城南值兵死福緣菴前之棟善屬文

江都學生

史炤蓆帽山人集雙溝舊志以爲駱馬湖

高孝鈺字仲達江都人尚書銓之裔孫天啟七年舉人署豐縣教諭陞河南信陽州知州莅任時賊氛已滿楚豫歲復大歉人相食孝鈺竭橐糴穀以賑晝夜設守備防不測監司王瑄恣睢乖戾輒更張孝鈺所部署弛備撫賊孝鈺力爭不得獻賊旣陷南城卽疾驅犯信陽舉火登陴城大潰孝鈺率眾巷戰賊首已踞州堂矣縛孝鈺偏之降餌以富貴孝鈺瞋目嚼齒抗聲罵詈遂加害汝寧守壯其節請之當路贈河南布政司參議廕一子

入監見明史忠義盛以恒傳暨康熙志案高氏譜銓

生淇淇生楨楨生煉煉生增增生孝銓舊志稱孝銓為銓之曾孫非河南通志云崇禎十四年官信陽

楊廷璧字荆璞江都人天啟二年高邦佐殉難死廷璧

時為諸生與趙元吉鄭元勳王玉輅等呈請祠祀以崇

禎八年歲貢生授舒城縣教諭十四年賊張獻忠攻舒

城廷璧分守西門登陴語縣令曰予職非守土今日之

事義不可辭萬一不守張巡許遠吾所師也鼓勵軍士

嚴守三晝夜矢石皆盡賊忽退士卒少懈賊猝至城陷

廷璧被執罵賊而死子濟之江都學生殉父死康熙志

王道隆字萱生江都人執經于王納諫之門時以理學

目之天啟甲子舉于鄉署壽州教諭以端亮範士陞山

東濱州知州人德其惠虞芮之訟輒待讞于濱崇禎十

六年流寇至濱陷道隆慷慨不屈被數創死眷屬十餘

口同殉及櫬歸濱之士民哭送數十里外立祠表其忠

康熙志

顧肇跡江都人夏國公成十一世孫封鎮遠侯甲申之

三月京師陷殉節見明史一百四十四顧成傳

吳明卿字伯亮其先歙人以業鹺家儀真性剛介不屈

少從維揚趙時用受業趙成進士擢給諫抗論權貴十

數疏多出卿手崇禎六年領鄉薦授江西崇義縣俗健

重刊揚州府志 卷之四十九  
三  
訟卿至竟月無差票無一鞭笞但日具壺茗坐堂上洞  
重門聽訟者出入就質數語折之半載巡按御史以政  
簡刑清薦於朝會甲申變扼腕數日不食死長子允蛟  
次子允超皆邑庠生蛟隨任適往贛聞訃亦自經死

儀徵

縣志

鄭元勳字超宗號惠東先世歙人祖景濂占籍江都遂  
爲江都人父之彥生四子元勳居仲年二十一舉天啟  
四年鄉試第六庚辰江淮大饑約族人捐麥千餘担爲  
粥於天寧寺以食飢者一友觸怒大璫元勳匿之璫大  
索並將中傷元勳友欲自出元勳曰吾懼禍初不汝匿  
矣急而出子非夫也護之益力南昌萬時華客死刑上  
斂而歸之羅萬藻遇賊被創迎而醫藥之且資其行貞  
婦孝子必庭白之有司約同志爲詩歌以彰其名字構  
影園以集天下名士崇禎十六年成進士假歸明年京  
師失守莊烈帝殉社稷元勳聞變麻衣哭於聖廟揚人  
聞流寇且東下先事載妻子去元勳破產招集義旅告  
以忠孝人始有固志元勳貽書當道謂宜建大帥統精  
銳以守河須山東響應乃卽大位會定策大臣有異議  
遂以四鎮兵擁其主渡江而南恐諸將不附手詔屯儀  
揚者爲共命臣四鎮中高傑最剽悍遣其副將南某先

駐揚州南某與川兵之勤王者爭舟被殺傑謬謂揚人  
殺其將駐城下殺掠不去元勳語當事曰傑奉璽書來  
無叛名且兵勢不可敵盡以大義譬曉之是時居守者  
兵備副使馬鳴騷與司李湯來賀有隙來賀父與元勳  
同榜進士交善鳴騷疑之聞元勳語獨不悅謂當城守  
格鬪而元勳之義旅或取傑兵樵採者傑而懸城上傑  
怒劫一村以報傑故李自成驍將後降爲總制王永吉  
裨將獲罪當斬元勳在永吉座壯其貌力請得免傑深  
德之元勳曰事急矣吾不惜此身以排鄉人之難單騎  
造傑家僮蔣自明遮馬諫曰願主人自保軀命元勳

曰爾何知揚民安吾頭亦可喪也遂入傑營責其剽掠  
狀傑曰副將楊成所爲出禁令退舍且誅楊成出通商  
符券數百張納元勳袖中斂兵五里外城中之門於西  
北者因得暫啟以薪粟入元勳遇人輒給券半途而盡  
後索者不能得爲譌言曰高傑以免死牌與鄭某非親  
暱與賄不得有死爾語一夕徧不信元勳從鳴騷以矢  
石中傑兵傑復徧城下譁元勳計迫急使高郵迎王中  
丞永吉來傑持刺逆之城下辭甚謙約永吉喜曰此人  
尙可與語徧告諸當事及紳士而後出見傑則一如元  
勳之語而加詳焉俄有兵掠仙女廟揚人責元勳元勳

卽草數字告永吉令詰傑傑曰偏城外有七大將奈何  
獨蒙惡聲遣騎詢之果吾兵當盡誅以謝他兵非吾責  
也永吉以報時已二鼓使者仰而號曰吾鄭公使自高  
營得書還城中狂譟謂鄭某果賊黨殺之城可守質明  
啟書眾共覺所疑之誤皆散走而聞者執前語不可解  
元勳得書急走城上或止之不聽揚人譌傳誅揚成爲  
誅揚城露刃圍之數重刃起遂及於難僕殷報奮身以  
殉時五月二十二日也後三日授兵部職方司主事之  
命始至從都諫李公沾疏薦也又旬日而閣部史可法  
至傑聞元勳死益怒急攻城可法從來賀之請梟賊首

王柱萬陳嘗張自強於市餘黨十一人笞斃棄其屍馳

書止傑傑望城哭祭移兵駐瓜州可法疏訟元勳冤劾

馬鳴騷禡其職於是揚人始悔曰鄭公實衛我以譌見

害無旄倪皆爲之悲哀元勳死時年四十二

杭世駿道古堂集

張伯鯨字繩海江都人萬曆四十四年進士歷知會稽

歸安鄞三縣天啟中大計調補盧氏崇禎二年稍遷戶

部主事出督延寧二鎮軍儲自黃甫川

康熙志作黃浦川

西抵

寧夏千二百里不產五穀芻粟資內地賀蘭山沿黃河

漢唐二渠東抵花馬池素沃野亦荒蕪甚伯鯨疏陳其

狀爲通商惠工轉菽麥又倣邊商中鹽意立官市法以

招之軍民稱便大盜起延綬擢伯鯨兵備僉事轄榆林中路擊破賀思賢斬一座城金翅鵬敗套寇於長樂堡巡撫陳奇瑜上其功詔進三階爲右參政仍視兵備事七年春奇瑜遷總督遂擢伯鯨右僉都御史代之督總兵王承恩等分道擊破插漢部長及套寇於雙山魚河二堡斬首三百伯鯨泄延綬久視民若子明年以拾遺論罷民大失望尋論功起用廕子錦衣千戶十年秋楊嗣昌議大舉討賊遣戶部一侍郎駐池州專理兵食帝命溥淑訓明年淑訓憂去卽家起伯鯨代之如淑訓官又明年熊文燦撫事敗嗣昌自出督師移伯鯨襄陽文燦之被逮也言勦餉不至者六十餘萬伯鯨坐貶秩十五年召爲兵部左侍郎明年尙書馮元飈在告伯鯨攝部事召對萬歲山疾作中官扶出遂乞休又明年京城陷微服遁還福王立於南京伯鯨家居不出久之揚州被圍與當事分城守城破自經死夫人韓氏冢媳郝氏同及於難伯鯨治行端亮不設城府平生篤于友誼位樞要猶拳拳布衣交其子廕生名雅度亦以長厚世其家善詩文不干聞達以諸生老

見明史二百六十七卷暨康熙志 鄒漪野乘鄞濱海故斥鹵地民貧多宦伯鯨下車躬自相度知鹵水入晦澮禾立槁乃教民築堰埭均蓄洩遂爲百世之利鄞俗主母刑婢妾輒加針於乳每數十櫛比伯鯨聞而痛治之習遂革鄉人有占人兆宅者恃巡方御史爲援

他守令或阿私伯鯨不可御史稱其惠而有義 陳奇  
瑜傳云參政張伯鯨斬滿鴛禽黃參耀隔溝飛康熙志  
云俘獲渠魁不沾泥

韓默字文適先世汾陽臨汾人父賈鹽家於揚州默入  
籍爲江都學生貌偉岸而性和易豪於飲善書法尤工  
臨摹督師史可法駐兵揚州謹重國書求法書最善者  
延默致軍門文武咸集默攝衣冠援筆點畫盡一二王眾  
皆異焉史公欲官之辭去乙酉揚州城破默謂妻蕭曰  
吾讀聖人書當守義死不可苟活若自爲計乃易服冠  
儒巾服襴衫阜絛鞞旣肅投井死蕭謂長子彥超曰爾  
爲長子宜隨父左右彥超諾亦投井死蕭令長女縊以  
幼子託老媪乃自縊死事具列女傳越二年居人浚井  
出默屍面如生衣冠整潔惟左手損一小指左足脫一  
鞞而已家人伏屍哭有頃左鼻出血人皆驚異乃棺斂  
以葬焉媪姓董受蕭託以三歲兒裹諸懷值大雨蛇行  
於刀頭馬脚之下伏死人中祝曰天不絕韓氏勿啼兒  
果屏息出城竄匿江灘拾麥穗啖兒得不死及長投故  
人高氏義育之兒名魏字醉白以詩名 見異香集暨百  
尺梧桐閣集  
高孝纘字申伯江都諸生城破書衣衿曰首陽志睢陽  
氣不二其心古今一致入學宮自經先聖座前 異香  
集  
王士琇江都人府學生乙酉城破書明莊烈帝黃紙牌



重刊揚州府志 卷之四十九  
供堂上偕其弟衣青衿對縊死同

三諸生王纘字伯綿纘字亞綿纘字叔綿興化人明末  
纘投水師總兵黃蜚幕纘初為高傑監紀傑為許定國  
所殺乃謁總督田仰授參軍仰死纘與兄纘棄家走東  
海奉宗室新昌王集戰艘犯興化有武生戴之藩奮勇  
登陴縛新令開門迎新昌入次日遊擊張將軍至新昌  
遜去乃捕纘斬之纘與父哲士沒於陣纘蹈海死家傳

都志云城破兄  
弟三人自縊死

戴之藩江都武生城破自盡死同時又有醫士陳天拔

畫工陸愉一作應募義兵張有德一作市民馮應昌操

舟人徐某俱殉義死江都縣志 案高孝纘至徐  
某十一人見明史史可法傳

張映發名爾中以字行江都學生世居邵伯鎮生平忠  
孝自命事親色養營笑不苟人目之為夫子讀書遇節  
烈事則拚卷歎曰大丈夫當如是矣位有貴賤綱常名  
教無貴賤庶幾於此身無負勿與草木同腐耳著四書  
正義未就聞城陷愀然曰死期至矣投邵伯鎮城隍廟  
西甘棠義井死家傳

饒餘字吉人江都人性孝父母沒家貧葬祭不能成禮  
每讀書至夜分則哭哭已復讀聞者為之泣下乙酉城  
破自縊年三十六先是聞李自成陷京師慷慨激烈憤

不欲生至是竟死

康熙志

汪應坤兵至自縊死子銓觸石死汪自盤

一作士超

同妻徐

氏投井死金颺同妻對縊死越八日夫婦面色如生劉

慶遠投江死呂家齊

一作學齊

投新河橋死宋祥遠與其妻

雙纓縊於庭陳三益投水死妻張氏貞操三十年如一

日史大相自縊死弟大儒巾服拜辭父抱兄屍而死皆

江都諸生

江都縣志

王廷珮同弟廷璉廷瑜見城不可守命酒環飲題壁作

大書談笑自縊死高一麟官指揮自刎死陸某隨史可

法督師及可法遇害陸亦縊死趙時雍自刎死其母姚

妻蕭及二女俱自縊高士遇躍入火中死子魁先為亂

兵所殺魁妻張氏至是焚死皆江都人

同上

梁于浹字飲光號谷菴江都人世居北湖崇禎二年舉

人十六年進士福王立馬士英忌于浹能除為萬安令

未數月叛將白之裔入萬安兵猝至城下于浹死守力

盡乃秉燭北面拜自經家人救之不死遂見執時家屬

居郭外勒寫書招之否則屠其鄉于浹曰國破家亡妻

孥何恤忍殃及於民耶即招家屬至投江為邏者所獲

絕粒三日不死囚之南昌獄中勸降于浹指鬚眉示曰

此豈靦顏避禍者在獄幅巾布袍談笑賦一詩白經死

詩曰但知生富貴誰識死功名到頭成个是方見古人  
情其僕梁善杜忠龔明張聰聰婦徐俱從死于溪少有  
詩名與鄭元勳爲虹等結竹西續社超宗影園開黃牡  
丹遠近徵詩以番禺黎遂球詩第一于溪次之後于溪  
元勳爲虹同登進士第而遂球亦先後殉節死談者稱  
之著有谷菴詩集孫嘉稷字五粲好讀書不干仕進嘗  
從軍滇南著萬里遊草見明史二百七十八萬元  
吉傳暨江都縣志雍正志  
鄭爲虹字天玉元勳弟元化子也五歲知書識大義十  
二能文章學於元勳崇禎癸未與元勳同成進士假歸

甲申五月謁選南都補福建浦城知縣調遣潰兵有節

雖衡邑供億不煩民政有聲乙酉六月唐王入閩道浦  
城知其廉能及自立名爲御史部民相率乞畱有十不  
可去之疏乃令以湖廣道監察御史巡視仙霞關駐浦  
城丙戌六月特令巡撫上游四府兼領關務當是時王  
師分道入閩抵仙霞關閩兵潰焚掠爲食爲虹與兵科  
給事中黃大鵬發倉庫以犒乃引去爲虹亟還浦城縱  
士民出走自守空城順治三年八月十七日

**大**兵直入浦城執爲虹爲虹奪左右刀自刺不殊遂見殺  
年二十有五爲虹美姿顏白皙廣穎平居秩秩然不自  
持至其慷慨赴義乃矯然如此越七月元化至浦城爲

易棺鬚眉戟張容色如生撫其一歲孤士炳扶觀以歸

黃大鵬與為虹同出中允劉文正理順之門與為虹同

日死僕陳龍亦從死王心湛缶林文集 明史為虹本

芝龍訴于王王為諭解時芝龍已懷異志 盡撤守關將仙霞嶺二百里間無一人

韓鼎新字煥然江都人崇禎七年歲貢生授浙江知縣

城破公服縊堂上死甘泉縣志 雍正志江都 縣志並作浙江某縣教諭

李淦字若金興化人父長倩殉國難淦隱匿官吏錄故

明子弟索之山中淦蓬首披麻出與抗卒不出同族有

若練者聞孫可望等踞滇黔必欲得賊首以洩忿人有

言賊可圖者輒喜多與之金使往殺賊日南向望後以

屢餽不能繼前之為萬里游者皆不至遂抑鬱死家傳

陳爰誦字周伯興化人萬曆二十年進士授四川西充

縣考取天下循良第四遷禮部主事以死王事贈光祿

寺少卿祀鄉賢新增 案此死於王事本 末未詳附於此以俟參考

陳爰謀興化人中萬曆四十年雲南昆明籍舉人知河

南汝州陞刑部郎中出為太平府知府致仕家居值沙

賊破城不屈死雲南通志

解學會興化人崇禎間揚州營都司從史可法守城城

破巷戰死勝朝殉節 諸臣錄

殷尚聲揚州人桂陽州吏目崇禎末郝寇屠城父子殉

難湖南通志

王道淑字善長其先豐城人四世遷儀真世有仕者道淑由泰昌元年恩貢授金華府經歷陞湖廣按察司經歷微官無可表見道淑安之每自謂吏隱廣州破以身殉焉其子械瑞從之闔門俱死嗣絕櫬骨遂不返其臨難有詩曰舍生取義尋常事地北天南頃刻飛寄語真州李文若忠魂萬里定來歸文若其壻也詩為道淑手書以寄之者儀徵縣志

李信字吾斯興化人由崇禎十年歲貢生授廣東和平知縣

大兵入廣州郡縣望風歸附和平邑最小眾憂懼不知所出信意氣自若呼二子浚遠淑遠語之曰死自吾分汝輩乘間速去二子泣曰大人死忠兒詎不能死孝相率為守城計邑人懷信惠爭用命城破父子俱被執浚遠縛急而泣淑遠叱之曰吾父子死猶生也何必泣遂皆

死康熙志

國朝乾隆四十年

特旨勝朝殉節之臣及建文諸臣之死事者核議予諡入祠於是郭任陳輔堯高孝鈇古道行諡烈愍張伯鯨諡忠節郝景春鄭為虹諡忠烈王道隆顧肇跡韓鼎新高一麟

陳爰謀解學會謚節愍楊廷璧子濟梁于涘郝鳴鸞鄭

元勳高孝纘王士琇弟王纘弟戴之藩宋祥遠韓默

汪應坤子張映發劉慶遠金颺呂家齊饒餘汪士超江

自王廷珮弟廷璉陳天拔陸愉張有德馮應昌舟子徐

某俱入祀郡城忠義祠倪可大李信王其高邦佐僕高

永鄭為虹僕陳龍梁于涘僕梁善龔明杜忠張聰郝景

春僕陳宜皆附其官於此地者督師史可法謚忠正知

府任民育陞任遵義知府何剛謚忠節左都督劉肇基

謚忠烈巡按御史王彬都指揮使崇剛兩淮都轉鹽運

楊振熙一作監餉知縣王道正江都知縣羅伏龍江都

縣丞王志端一作副總兵汪思誠揚州府同知一作

事王纘爵監軍兵部尚書吳易謚節愍副總兵乙邦才

馬應魁莊子固樓挺汪應龍一作江李豫副旗鼓參將

陶國祚左營參將許謹右營參將馬國用前營參將陳

光玉參將李隆徐純仁遊擊李大忠孫開忠都司姚懷

龍揚州同知曲從直江都知縣周志畏謚烈愍吳易父

吳承緒曲從直子某監軍吳之福周瑞史公幕府歲進

士盧渭生員歸昭揚州府經歷馬從龍入忠義祠其有

未經題請載在府縣志及葛崙所輯史公志者兵科給

事中施鳳儀督餉僉事黃鉉通判吳道隆禮賢館盧經

嘉慶揚州府志 卷之四十九 人物忠義

才何臨胡如珵副旗鼓參將陶匡明隨征書記顧啟印

陸曉龔之厚唐經世庫官談三傑子大都司千總殉節

者二百餘人可稽者十四人吳魁馮士富以仁一作孟近仁

容徐應承張小山段元范倉張應舉曾登元范泗范海

王東樓一作十五人有郭倉任民育幕客陳美督師史可法吏陸

某生員史大儒大相陳三益史可法僕史書任民育僕

聞道錢禹錫僕錢成談三傑僕天喜人衡嘉慶八年正

月舉人萬厚昌閔志塏歲貢生姚澍袁世勳生員袁世

烈姚潢副貢生張維楨呈請江都甘泉兩學江都教諭

范鑑甘泉訓導鄭環移兩縣轉詳各憲奉准入祠忠孝節烈

案明史張輔傳附徐政云政儀真人建文時為揚州

衛副千戶以城降成祖累遷都指揮同知從征交趾

奪船於三帶江以濟大軍拔西都轉鹹子關皆有功

陳季擴反盤灘地最要衝張輔遣政守之七年八月

賊黨鄭景異來攻與戰飛鎗貫脇猶督兵力戰竟敗

賊賊退腹潰而死考朱鷺建文書法儼云王彬奉命

巡江淮治揚州北兵至崇剛練兵濬濠晝夜不懈彬

一倚任之指揮王禮懷二心彬剛覺之執禮及其黨

繫獄彬外禦內防七日不懈常隨以千斤力士禮弟

宗厚賂力士母誘力士出適彬解甲浴盤中爲千戶  
徐政張勝所縛昇至城上投靖難兵中不屈死之政  
遂出禮等時江都知縣欲守節不附其母曰天命也  
可違乎遂與政開城門降史但稱以城降而縛王彬  
獻城者實政也故不入忠義傳而又不沒其死于疆  
場特附于輔傳耳顧縛帥獻城非尋常降敵可比仍  
依明史之義附錄於此

國朝

董潏字禹門江都人順治三年恩貢生隨征福建以功  
授沙縣知縣時閩疆新定潏善撫字百姓安之四年山  
賊羅某與妖僧米逢年共爲亂寇沙潏出戰屢敗之賊  
環攻三閱月不退守益堅一日賊攻東門潏并力禦而  
逢年誘縣丞黎某開西門納賊潏急令其子亦舒壻張  
思治率家丁五十三人與賊巷戰並死焉潏被執罵賊  
甚厲賊怒叢射之仍割其頭去妻葉抱一歲孫蘊匿民  
舍以免事上

贈按察使僉事蘊廕知縣歷馬湖知府

江都縣志

卜明元字汝吉江都人負遠志喜游俠初爲巡撫王一品所知用未竟尋隸經略洪承疇部洪奇之置幕府屢著績薦授貴州平越府推官時黔中初定遺氛未靖明



元經理盡善賊劉國祿以其地在必爭以兵逼之明元

與戰被執不屈死之承疇為具疏請卹案卜明元載康熙志內雍正續

修志芟去江都縣志所載與康熙志互為詳略今明元祀忠義祠仍據康熙志錄存之

閔文仲瓜洲人江都學生順治己亥海兵寇瓜洲文仲

居圍城中倡義固守城陷寇執之不屈以刃畫其面文

仲卽投井死江都縣志

孫之一作志烈字式武江都人崇禎十六年武進士官江

西都指揮

國初調征楚寇至鄱陽上蘭力戰俘馘無算以援兵不至

死之士人王紳有悼忠歌紀其事康熙續志

陳錡字龜臣高郵人順治九年武進士驍勇絕人常以

忠義自許初任山海關守備遷湖廣荊州府遊擊尋遷

副總兵時山賊猖獗賊首李來亨結巢深峒提鎮進兵

會勦命錡為前鋒錡建議搜捕火焚林箐破其四峒賊

窘甚伏火礮自保會錡奉令深入伏發從騎皆沒錡轉

戰三日手格殺數百人馬力不可支乃拔腰劍自刎曰

吾今有以報國矣事上廕一子千總名大用高郵州志

王相呂字望子泰州人順治三年舉人授睢寧教諭以

文行教士士皆懷之適海弁亂攻睢寧城陷不屈死之

贈助教祀鄉賢子孫驛字阜馬相呂死難時奪刀救父亦

被賊斫其頭顱良久復甦有異僧以藥傅創口數日愈乃捧父印懇於太守得邀

旌典

見康熙續志暨泰州志

劉崇植字汝潤本直隸衡水人先世有名孟禎者當天順復辟奉詔逮于忠肅家口孟禎憫其寃故逗遛以待救遂得罪戍揚州八傳至崇植好讀書負氣遇里中不義事輒恥之女三姐嫁山西陽城段上彩為繼室上彩以進士授江南沭陽縣令崇植依壻任未幾山東榆園軼賊突犯沭陽上彩罵賊死三姐亦死城陷時崇植跳而免及聞上彩夫妻死立還署奪賊刀大呼斫賊賊大驚斫崇植立死時年四十辛卯三月十九日也子應祥甫九歲稍長知父死賊故日夜號泣乙酉始至以父柩歸葬

岳林文集

宋之儒字二尹江都人順治九年進士由戶部主事出為河南衛輝府推官行取戶部轉授雲南驛傳鹽法道康熙十三年三藩作亂之儒抱印坐道署諭家人無出一家七口殉節

增新王明德字亮士少保永吉長子由廕生歷任刑部郎中著讀律佩鱗傳于世轉湖廣漢陽府知府會提督譚洪反明德督糧入川陷逆境脅授偽官不從以死自誓投

水不死削髮為僧

大

兵進勦譚逆殄滅明德奔歸本土至夔州萬縣夜黑覓路跌深厓間兩手足皆重傷僕劉振玉背負抵寓卒巡

撫王新命有祈旌疏

高郵州志 明德子心湛與萬令

佛寺訪前漢陽太守度世處又設位以奠如禮不肖聞之感且泣西向泥首以謝自譚洪之逆訖於天祕萬民不聊生者半歲先大夫為洪祕陳說背天虐民之不可者數四洪受之祕不能也於是積忿於先大夫必欲得先大夫而甘心焉崎嶇萬山中期赴大軍以拯萬之焚溺道梗不得達恚憤投崖以殞事詳大將軍哈公總督王公新命提督徐公治諸疏先大夫生平急人之急拯人之危快人之憤解推於朋友均財於兄弟竭心力以營王父母之邱壠而家以日乏謂宜得廁於郵之鄉賢守漢陽未一年除大猾賑大饑備嘗險阻以舒民力雖歲奉春秋之祀於沔陽亦不為過惟野君以一言勸之貞珉載其所以拯萬過萬因以僧於萬頌於萬之故便

千秋百世後知當年之漢陽太守忠君愛民如此皆吾野君之賜也心湛字濟上號止齋深於古文宋學稱其兼魏禱之森峭侯方域之奮迅軼事潛蹤之可傳者必亟為闡揚以極其致為有得於古人立言之大者宜與

侯魏鈍翁西溟為五家終於歲貢生著有岳林文集二卷又有尚書輯解半山文議續小學簡注若干卷

劉欽鄰字江屏其先江西新昌人曾祖讓官兩淮運司

後遂占籍儀徵父全樂樸雅有古風欽鄰登順治十八

年進士父亾奉母不就銓至康熙戊申始授廣西富川

縣縣新定欽鄰百計撫綏循聲日著甲寅孫延齡叛於

桂林逆兵犯平樂偽檄至富川欽鄰請援於督院未至

偽忽以兵圍城欽鄰率親丁鄉勇戰卻復至弁士有為

賊內應者城陷欽鄰巷戰不勝被執至平樂欽鄰罵不

屈送至桂林以兵守之賊欲授之官欽鄰怒擲其印北  
向拜闕東向拜母作絕命詩曰反覆南疆遠辜恩逆醜  
狂微臣猶有舌不肯讓睢陽遂自縊死邀

贈卹如例後十餘年子孚嘉以廕補官始比例請諡諡曰

忠節儀徵縣志 廣西通志云康熙十三年孫延齡已  
附逆欽鄰募義勇為戰守具會防守把總楊虎奸

民蔣吉士等私受偽劄執欽鄰池北偶談云兩廣總  
督疏聞得旨劉欽鄰忠憤死節深為可憫應得

卹典從優奏予在揚州時劉初釋褐其人  
詢何儒素而大節如此可敬亦可哀也

吳道岸江都人順治二年恩貢生七年隨

大兵收粵任連山知縣潔已愛民催科不擾所為善政歡

聲載道八載馬寶入寇連山城破執道岸去至陽山不

屈與陽山知縣屠洪基同及於難廣東通志

劉梁嵩字玉少江都人康熙三年進士授江西崇義縣

擒流賊七十人被害乾隆二十三年奉

旨配享昭忠祠節略

湯正垣江都人康熙十六年舉人授廣西柳城縣因勦

賊匪羅應鸞卒於軍樞回籍入城治喪同上

丁光國江都人由吏考滿署湖南淑浦縣龍潭巡檢司

乾隆六十年苗匪倡亂光國率弓兵民壯隨署府某拒

賊親冒矢石歿於陣賊焚掠至署妻蘭氏與三歲子榮

泰懷印奔馬鞏山賊追至擊蘭左手食指斷榮泰失去

苗婦石怕氏收養之久之抱還蘭有苗役龍貴者與石怕氏之兄石文才護送入城得歸籍賊平光國

贈雲騎尉入祀昭忠祠廕一子新

附義僕後漢書李善入獨行傳明史以阿寄入孝義傳高永陳龍等既從入忠義其劉信甫等亦

彙附於後

元

劉信甫揚州人富商曹氏奴曹瀨死以孤託之孤漸長孤之叔利其財妄訴於府曰某家貲產未嘗分析今悉為姪所據郡守劉察其詐不直之叔之子以父訟不勝慚且憤毒父死而復訴于府曰弟挾怨殺吾父適達魯

花赤馬馬火者受署之初與守不相能竟欲置孤法并以中守引致百餘人抑使誣服曰孤俾某等殺叔守受孤賄若干末鞠信甫信甫曰殺人者某也孤實不知守亦無賄既被鍛鍊無完膚終無兩辭初信甫先遣人密送孤至京師匿一達宦家屬之曰慎毋出至是厚以金帛賂達魯花赤孤得免信甫減死既而叩蹕陳告達魯花赤以罪去守復官是獄訟道里費巨萬計孤欲算償信甫曰奴之富主翁蔭也主有難奴幸脫之分內事耳寧望求報哉力辭不受輟耕錄

明

顧黑子揚州人與其主顧圭以戎籍隸泉州洪武初圭坐事繫獄累歲黑子採薪給圭圭釋歸復以甘脆爲圭養圭死其子窶甚黑子仍爲酒家傭給贍其衣食爲娶妻人嘆黑子微賤而有士君子之行

雍正志引名山藏

張福江都人黃國相之僕明末福與國相同遇兵國相死福頸被刃止氣喉未斷脇下亦被創從積屍中以手捧頭匍匐奉主媪避匿主媪以弱篋支其頭越數日勢定創亦稍愈始獲送主媪詣北鄉而幼主被繫至金陵福渡江行乞遍走諸營於牧場得之至夜負歸黃氏母子復聚福終老其家

江都縣志

陳宜江都郝景春之僕罵賊死耐祠法海寺

事詳郝景春傳

錢成江都錢禹錫之僕城破禹錫奉令守城妻王氏以六歲子溥拜屬成護之兵遽入王氏自縊死成負溥乘夜走匿北鄉復入城迎禹錫遇兵死

雍正志

國朝

姚德甘泉姚惠之僕也順治二年

大兵下揚州惠之子嘉祥被執德哀號奔赴遇諸塗值守者懈私釋之而自繫於獄俘中遂死之德子道仍爲姚氏僕嘉祥子雋早逝妻楊守節遺兩孤長錡方十歲次鎮生僅數月道曰曩者吾父死徒以姚氏一脉耳今姚

氏若此是我報主恩繼父志之日也日夕編草織屨以  
供饋粥年六十操作不倦既歿錡葬之祖墓側子孫歲

時祭其父子

姚澍揚州  
孝義錄

王珍寶應李行一之僕行一娶潘氏無子珍少育於其  
家潘待之有恩潘卒珍事行一不肯去行一家既落老  
而益貧目又瞽珍左右奉養歷數十年不懈行一妹適  
郡城張氏時迎以養未一月輒歸以為不能如珍之順  
意也珍嘗衣極敝袴或問之曰吾有新袴已入質庫買  
籠奉主人矣他多此類李有族人欲引為己用特置酒  
筵拜謝其奉主之勤因取十金託珍代為經營珍以餘

利奉主人仍以原金還而謝却之王懿誦赴烏程任欲  
屬為司閹辭不往年三十始娶妻同心奉事至老無間

言

田草  
堂稿

劉昇儀徵人歙縣潘楚玉之僕楚玉性褊急少違意輒  
捶撻無虛日昇不怨楚玉母病昇割股肉和藥療之楚  
玉死家業中落昇黽勉負荷為嫁女葬女楚玉之子次  
璜稍長為娶妻妻死復娶家益窘昇筋骨且衰矣乃賃  
于人力作以供幼主衣食盡瘁至死

吳嘉紀  
陋軒集

符進祿柴姓之僕柴本紹興人作宦於廣東潮州府因  
葫蘆山發水罷職遂卒於湖原籍產業蕩然進祿奉其

家眷就戚揚州是時別無生計惟挑柴於市以供餽粥其妻亦以針黹佐之上養孀主母以終餘年下撫兩孤成立厥後柴之骸骨至揚進祿負之葬於司徒山每歲掃墓皆痛哭流涕聞者為之酸鼻

孝義錄

周大寶應潘愷之僕從愷往田舍有佃暴死潘氏之族誣愷殺之引僕為證知縣吳之珽訊僕考掠累日僕力陳其寃遂以夾折其脛血溢口鼻而死瀕死猶胡嚙言佃實病死既絕而目不瞑聞者哀之知縣已致僕死而懼安云僕承遂易其辭以上獄不決者五年其後巡撫劉某參驗僕辭而疑之讞之得其實為罷知縣官而抵族人罪於是獄遂白愷為僕置冢子孫世祀之勿絕

汪中

書周義僕事

蔡金宏東臺繆珏之僕從珏貴州征苗多得其助珏歿於軍營遺幼妾孤兒金宏泣訴上司返櫬同歸

繆氏族譜

重修揚州府志卷之四十九



正德...

卷之四十一

...

